



SEMANGAT...Warna-warni sekitar Sambutan Hari Pahlawan dan Pelancaran Bulan Patriotisme 2010 di Dewan Mu'adzam Shah, semalam.

UUM ONLINE: Pemimpin terdahulu mempunyai pemikiran yang tajam kerana mahu menggantikan darah perajurit dengan perjuangan baru untuk melahirkan generasi berilmu, berwawasan dan bakal mencetuskan keamanan kepada alam sejagat, kata Naib Canselor Universiti Utara Malaysia (UUM), Prof. Dr. Mohamed Mustafa Ishak.

Menurutnya, kekuatan perjuangan perajurit membuahkan hasil apabila UUM mempunyai 75,000 ribu alumni di seluruh negara dan Pekan Sintok yang dulunya sebuah kawasan hutan belantara kini berubah wajah menjadi gedung ilmu kepada lebih 31,000 ribu pelajar.

"Ini bermakna perjuangan perajurit terdahulu yang gugur di kawasan ini tidak sia-sia dan diteruskan oleh generasi hari ini yang lebih cintakan keamanan dan kesejahteraan," ujarnya.

Beliau berkata, tanpa perjuangan perajurit dan pasukan keselamatan, keamanan yang sedia ada tidak akan tercapai kerana negara melalui pelbagai rintangan sebelum mencapai tahap aman ketika ini.

Mengulas mengenai sejarah Sintok, beliau menambah ramai perajurit terkorban dalam usaha memperjuangkan hak di bumi Sintok ini daripada penganas komunis.

Ujarnya, kawasan Sintok diteroka pada awal 1990-an oleh kaum Cina yang memulakan aktiviti melombong bijih timah di kawasan ini sehingga muncul perkampungan kecil di kawasan Sungai Badak dan Bukit Kachi.

"Kawasan ini agak terpencil dan keadaan perhubungannya agak sukar, jalan-jalan sedia ada agak kecil dan berliku menyebabkan pihak kerajaan tidak mengawal rapi kawasan ini kerana dipenuhi dengan hutan belantara.

"Bagaimanapun, kawasan hutan ini juga terdapat rangkaian yang menghubungkan Selatan Thailand, Sintok, Padang Sanai, Nami, Sik, Baling dan kawasan utara Perak.

"Keadaan hutan dan faktor geografi itu menyebabkan Parti Komunis Malaya (PKM) menggunakan keistimewaan alam semula jadi yang strategik untuk bergerak aktif di kawasan Sintok yang bersempadan dengan Thailand.

"Di sinilah, bermulanya sejarah perjuangan perajurit kita apabila PKM mula mengganas dengan memerangi pasukan polis yang ditempatkan di kawasan ini apabila PKM melancarkan kegiatan subversif dan ganas dengan menyerang hendap pasukan keselamatan sehingga ramai anggota keselamatan yang terkorban, cedera dan hilang," katanya.

Ujarnya, beberapa serangan hendap dan pertempuran berlaku di kawasan Sintok, sejak 1948 sehingga pihak kerajaan mengambil tindakan memindahkan penduduk dari kawasan Sintok dan Sungai Badak ke Pekan Changlon serta menahan 50 hingga 60 penyokong PKM untuk dihantar ke Pulau Jerjak.

Jelasnya, kegiatan penganas komunis berterusan sehingga 18 Jun 1975 dan berakhir dengan perjanjian damai apabila PKM bersetuju meletak senjata dalam perjanjian yang ditandatangani pada 2 Disember 1989 di Haadyai, Thailand antara Kerajaan Malaysia dan Thailand.

"Hari ini, tanah di mana gugur satria negara dibangunkan sebuah kota ilmu iaitu UUM sebuah Universiti Pengurusan Terkemuka justeru kita sangat menghargai jasa perajurit yang terkorban kerana tanpa mereka siapalah kita," ucapnya.

Tambahnya, jasa dan pengorbanan perajurit tidak sekadar dengan sambutan sahaja, malahan UUM melancarkan Tabung Hari Pahlawan dengan mengutip derma bagi mengurangkan bebanan keluarga bekas perajurit yang terkorban dan cedera dalam perjuangan mereka di tanah air yang tercinta ini.

"Mungkin sumbangan ini agak kecil berbanding perjuangan mengangkat senjata tetapi budaya membantu harus diterapkan dalam diri setiap pelajar dan kakitangan di Universiti ini," ucapnya pada majlis Sambutan Hari Pahlawan dan Pelancaran Bulan Patriotisme 2010 di Dewan Mu'adzam Shah, semalam.